

四庫全書

集部

欽定四庫全書

梁谿集卷十七

宋 李綱 撰

詩十三

自丁未秋罷相後作
及戊申歲四十六首

序

寶劍聯句

山藥

煨芋

食蟹

對菊小飲簡申伯叔易

小飲即事呈申伯

玉華宮用杜子美韻

九月八日渡淮

九日與申伯叔易小飲

章華宮用張籍韻

次韻季弟阻雪

善權卽事十首

投金瀨有感

題輞川雪圖

次季弟韻賦梅花二首

宿黃柏村館

寧國縣圃雜花盛開

二首

詠草

初見楊花

黔歛道中士人獻牡丹有盈尺者為賦此詩

自鄱陽泛江至星子 過彭蠡

遊落星寺

望廬山

韓德全以小舟相迓於落星寺下

遊廬山

過玉澗道人草堂

五老峯

羅漢寺

欲遊尋真觀不果

栖雲庵

三峽橋

萬杉寺散珠亭

諸刹以石渠道水有十餘里者感之賦詩

序

詩以風刺為主故曰上以風化下下以風刺上主文而

謫諫言之者無罪聞之者足以戒三百六篇變風變雅
居其大半皆有箴規戒誨美刺傷憫哀思之言而其言
則多出於當時仁人不遇忠臣不得志賢士大夫欲誘
掖其君與夫傷讒思古吟詠情性止乎禮義有先王之
澤故曰詩可以羣可以怨小弁之怨乃所以篤親親之
恩鴟鵂之貽乃所以明君臣之義谷風之刺乃所以隆
夫婦朋友之情使遭變遇閔而泊然無心於其間則父
子君臣朋友夫婦之道或幾乎熄矣王者迹熄而詩亡

詩亡而後離騷作九歌九章之屬引類比義雖近乎悱然愛君之誠篤而嫉惡之志深君子許其忠焉漢唐間以詩鳴者多矣獨杜子美得詩人比興之旨雖困躓流離而不忘君故其辭章慨然有志士仁人之大節非止模寫物象風容色澤而已余舊喜賦詩自靖康謫官以避謗輟不復作及建炎改元之秋丐罷機政其冬謫居武昌明年移澧浦又明年遷海外自江湖涉嶺海皆騷人放逐之鄉與魑魅荒絕非人所居之地鬱悒亡聊則

復賴詩句攄憂娛悲以自陶寫每登臨山川嘯詠風月
未嘗不作詩而嫠不恤緯之誠間亦形於篇什遂成卷
軸今蒙恩北歸哀葺所作目為湖海集將以示諸季使
知往反萬里四年間所得益如此云庚戌清明日梁谿
病叟序

寶劍聯句

造化鑪錘巧山谿鑛鑠良精金付歐冶妙手鑄干將淬
礪呈鋒鏑伯紀飛騰辨耿光青黃司火候中伯爪髮助祈禳

桃氏幾時獻

正叔

龍文難久藏鱗皴識松理乙屈認魚腸

黯黯青蛇色

紀伯

炎炎赤帝祥提攜起三尺伯申駕馭牧羣

狼彈鋏悲馮子

正叔

誇鐔悟趙王神功歸不試利用運無

旁贈客千金直

紀伯

方人百鍊鋼還須玉具飾何用崩縹

裝詎使妖腰喜

伯申

當容節士狂純盧非斌媚巨闕太堅

剛鬱勃衝牛斗蛇蜿蜒接混茫疇能寶於越俱議刻舩艍

杖拭資神土

正叔

珍藏閼寶房斬蛟誠壯勇刺象見鉅鉞

韓信歸高祖朱雲賜尚方雄材元倚仗佞膽已飛揚渾

脫公孫舞

伯紀

縵胡庶士傷吳鉤能曲折蜀漢有文章六

賜恩何厚三名怨未償先知吼蛟兕摩鈍凜冰霜犬子

嘗思擊

申伯

猿公莫敢當翁歸備文武季路戒彊梁疾視

真何事

叔正

要盟或可臧鏡天隳彗宇適野走徬徨麾拂

飛雷電

伯紀

軒昂變雨暘刺強同匕首定亂豈長槍叔向

排當御昭王畏拙倡買牛今欲老

申伯

鑄鑄歲方穰

叔正

徐

國留吳札鴻門蔽項莊拄頤真貴盛擊柱妄披猖曜儼

山妖見秦興水怪彰萬人猶可敵一呖未應駭不動驚

公勝為誇異伯陽斷匪猶未妙穿屋始非常止水涵晶
瑩疎星點角芒聊須為武備何必事戎行要並宗臣履
休同小盜裳衝星憐杜子斫地歎王郎伯申不假蒙須便
真成刃手創新硯如可發故物未應忘叔點虜稱兵急
王師擊鼓鏜氛埃期掃蕩心膽為開張未斬樓蘭級那
銷黔首瘡幾回開匣罷但欲引杯長聊復防身佩毋為
躍水亡報君吾志畢以爾倚扶桑伯紀

山藥

山家為我斲青冥養就仙芝指掌明風味自應殊紫芋
功名初不減黃精藤盤欲薦冰霜質石鼎先聞風雨聲
辟穀留侯正歸去淡然悠久見交情

煨芋

今夕何夕夜未央天寒擁爐更漏長縮肩環坐有飢色
呼童取芋灰為塘蹲鴟得火良易熟脫落皮毛如紫玉
迭煨迭進爭相先笑語頗喧知實腹錦里先生亦不貧
家園收拾動千斤凶年自可活妻子美好不減岷江濱

鄴侯昔遊衡嶽左，懶瓚食餘貽半箇。我今歸去隱家山，
豈復從人覓殘顛。臞儒奉養亦已微，一飽便吟煨芋詩。
君不見齊公夜半意不慊，易牙煎熬燔炙和調五味而
進之。

食蟹

秋風蕭蕭蘆葦蒼，野岸郭索紛成行。持矛被甲正雄健，
意氣正欲行無旁。朝魁執穗似有禮，擁劒敵虎何其強。
野人篝火夜採撿，束縛赴鼎如驅羊。樽前風味若無敵，

莛以橙橘尤芬芳流膏斫雪快一飽咀嚼海錯皆尋常
丹楓夜落吳天霜櫂極欲熟千畦黃梁谿白蟹正可釣
雛雞濁酒肥且香先生歸去營口腹老饕未許他人當
家山漸近意漸適思歸豈獨鱸魚鄉

九月五日對菊小飲簡中伯叔易

淵明愛此九日名對菊無錢可留客杜陵爛醉作生涯
青藥空嗟未堪摘我今鼓枹適長淮坐見幽叢爛熳開
自從多病久不飲又爾一洗黃金鼎東南節物誠已早

翠葉金花為誰好三徑荒蕪爾尚存未覺出山同小草
世間萬事皆可忘且須泛此酬秋光平生最愛老坡語
菊花開日即重陽

小飲即事呈申伯

夜涼同詠古人詩新月娟娟照酒巵一醉且忻軍寇退
扁舟似與菊花期銜杯樂聖真吾事泛宅浮家漫爾為
歸去雲山最深處隔江千里幸相思

玉華宮用杜子美韻

阿房但遺基銅爵亦飄瓦茲宮製何朝棟宇妙天下溪
山最清絕畫手不可寫于今黍離離客過淚如灑廼知
營宮殿徒以業力假起滅猶浮漚聚散齊一馬如何世
間士天運欲持把此理貫古今宜有知之者

九月八日渡淮

長淮渺渺煙蒼蒼扁舟初脫隋渠黃平生見此為開眼
況復乞身還故鄉嗟余涉世誠已拙徑步不虞機穽設
空餘方寸炳如丹北望此時心欲折楚天清曉作輕寒

黃蘆著霜聲正乾川迴金碧隱窳堵風遠鍾磬聞龜山
舫聲嘔軋歸何處笑指江臯尋舊路松菊荒蕪欲自鉏
盜賊顛飜非所懼

時聞錢塘盜作故云

蟹螯菊蘂風味且須為

盡黃金舟世間種種如夢電此物能消萬古愁

九日與申伯叔易小飲

上客相從稱玉觴楚天杳杳湛清光紫茱黃菊有佳色
白蟹頰鱗聊共嘗自哂三朝為逐客常於九日旅殊方
十年往返成何事贏得蕭蕭滿鬢霜

章華宮用張籍韻

楚王初建章華時脩梁巨棟如雲垂諸侯共落相長鬣
示汰往往逃而歸當年左史箴王闕祈招之詩為之發
固宜便嬖意相當肯使俊乂居周行宮中門戶如蓮房
錦茵繡幕春風香娥媼曼睩肌雪霜侍燕承娛夜未央
金石間作侑玉觴兕觥不復稱公堂志窺九鼎輕天王
翠被豹舄垂瓊璫乾谿之辱豈其壽峻宇雕牆湏于酒
次韻李弟善權阻雪古風

歲晏江南三尺雪
奕奕瀟瀟遂連月
意濃豈是天網疎
勢重便疑坤軸折
溪行小艇碎瓊瑤
自勝縞帶隨車轍
暝投蘭若寄僧房
更覺千巖鳥飛絕
憶昔宣和全盛年
嘉瑞應期來自天
千官朝賀未央裏
仰視龍尾垂蜿蜒
珠樹瑩煌青瑣闥
玉花浮動蒼龍闕
但將歌舞賞清妍
肯信山河會分裂
自從國步多艱難
寇騎長驅窺漢闕
陰風慘淡隨殺氣
見雪翻使摧心顏
古來治理初無別
上國浸強夷浸滅
坐令和氣變陽春
肉食于今未宜忽

迂愚放逐恩已寬敢憚道遠貂裘寒空餘炯炯寸心赤
中夜不寐憂千端素髮飄蕭頭已滿百年光景行將半
未知夢幻此生中幾回看雪光凌亂會當掃動豺狼穴
國恥乘時須一雪酒酣拔劍斫地歌心膽開張五情熱
中興之運我期皇江漢更灑繫臣血

善權即事十首

荆溪移櫂雪漫漫皓色連空眼界寬練帶縈迴迷罨畫
玉屏峯失銅官風飄珠藥來玄圃槎泛銀潢到廣寒

安得丹青似摩詰生綃寫作圖畫看

十日荆溪雪未晴敲冰聊作善權行最憐擊碎瓊瑤片
欲愛長聞環珮聲百仞巖端仙梵過千株松下老僧迎
斯遊自覺平生少頗怪淹留景太清

雪著谿山澹復濃行舟疑在玉壺中雲藏半嶺深難見
冰塞長川邈未通賴有僧房客假榻未應塵跡歎飄蓬
勞生夢幻成何事萬古閑愁一笑空

山岷溪灣三四家竹籬茅舍暮烟斜山村自種田田玉

梅徑疑開處處花
近渚冰銷迷浴鷺
遠村煙暝數栖鴉
年年值雪長為客
對此悽然感歲華

小童又報雪花飛
深注鑪煙欲起時
浙瀝乍聞經竹葉
飄蕭初看著松枝
南人共訝何曾見
北顧深顰有所思
牢落無言自搔首
却驚華髮頓成絲

一夜凝寒雪意濃
禪房睡美不聞鍾
起看銀色三十界
更憶瑤臺十二重
戴白蒼官尤覺好
折腰青士若為容
暮晴透出寒蟾色
為照溪頭羣玉峯

連日風雲匝地陰
玉花飛舞滿煙岑
竹牕夜色暮方適
書幌朝寒酒倍斟
幸有高人同勝賞
不妨佳處得幽尋
庭前暗積知多少
自策筇枝探淺深

山空鳥雀傷簷楹
景邃惟聞鐘鼓聲
懶瓚但知煨紫芋
少陵何處斲黃精
江南冠盜休無賴
塞北煙塵近未平
太息浮生端值此
不如無念契無生

霽色初開雪未融
坐來風撼落長松
林花飜捷緣飢鼠
洞壑深沉蟄老龍
致遠未須金駉裹
憑高且看玉芙蓉

豐年最有田家樂雪屋何妨入夜春

朝來鳥雀報新晴乍喜牕間日影明
糝徑楊花渾寂寞倚簷水柱漫崢嶸
早梅向暖垂垂發好鳥知時得得鳴
從此陽光漸舒暢放回春色滿江城

投金瀨有感

楚王聽讒誅五卿招呼二子同就烹
子胥彎弓見使者義不戴天非惜生
操瓢乞食困江表曷嘗一日忘郢城
涇水之陽遇真識壺漿簞食相迎當
時追捕尚爾急

殺身滅口意豈輕霸吳何止服勾踐破楚遂以鞭荆平
倒行逆施道雖遠復仇攄憤聖所稱却來訪舊欲報德
歎息玉質隨流萍投金淺瀨亦何有聊以寓意通精誠
哀窮進食類漂母解劒掛墓同延陵古人已矣不可見
空有史筆垂聲名

題成士穀所藏輞川雪圖

朔風飛雪何漫漫羣山大半埋雲端藍田丘壑不易得
更把雲雪粧林巒茅齋竹屋架巖巘軒楹面勢隨所安

素華浙瀝灑空翠逼耳似聞聲正乾層崖凍冱石欲裂
飛瀑不礙雙流湍長松落落有生意連臂下飲惟玄猿
椒園柳浪眇安在髣髴猶認芙蓉泝乘危跨蹇者誰子
竦肩縮袖何其寒祗應詩句獨有得不減灞橋風雪間
幽人一去久寂寞寒藤滋蔓誰能刪生綃數幅寫絕景
空有圖畫今人看

次季弟韻賦梅花二首

冷蘂疎枝煙水濱江南此地又逢春年年行路常為客

的的寒花解笑人雪裏暗香來鼻觀風前高格見天真
誰言對爾銷愁得一段清愁特地新

羣芳凍死未招魂誰使梅花獨占春願折繁華憑驛使
為傳幽思惱詩人心馳魏闕慙商鼎路入章江憶子真
莫道廣平心似鐵賦辭得得與清新

宿黃栢村館

客館可人意敢懷行路勞軒牕面蒼翠棊酒助嬉遨雨
過竹聲碎風搖雲影高人生隨處適何必賦離騷

寓寧國縣圃中桃李雜花盛開感而賦詩

春光不為干戈薄
花縣縱觀桃李開
可惜繁華勞剪刻
莫教風雨便殘摧
溪山有意相輝映
蜂蝶多情自往來
應笑逐臣心似鐵
客中扶病亦登臺

乍雨乍晴三月節
半開半合百花枝
傷心春望不堪遠
感事淚痕長欲垂
塞北但知隨水草
江南何事插旌麾
上林無限鶯花老
應怪來遊鳳輦遲

詠草

夢覺池塘碧草萋風搖煙濕已菲菲
繇聯山色不知遠惆悵王孫何日歸
微質亦知煩雨露寸心終欲報春暉
芳根縱腐猶能化舞蝶流鶯到處飛

休寧縣驛舍初見楊花

山館風光隨分好方塘碧長萋萋
草楊花搖蕩入疎簾又是一年春色老

點歛道中士人獻牡丹千葉面有盈尺者為賦此
詩

平生愛花被花惱每見牡丹常絕倒自從喪亂減風情
兩年不識花枝好邇來謫墮烟雨中行色日與春光濃
今夕何夕見繁者頗類壽安千葉紅豈知黥歙深山裏
乃有此花端若此不論玉板與鶴鵠可亞姚黃并魏紫
嫣然見我如感傷似訴處此非其鄉吾哀多病不解飲
對爾歎息空持觴人言老境花如夢獻此慙懃情已重
蠟封瓶貯可多時惆悵洛陽今不貢

自鄱陽泛江至星子

我行黔歙間山隴如黏蠟澗水互縈繞路石何境磬深
谷四無景峻嶺干雲霄朝行嵐氣合暮宿怪禽號吾雖
一險夷無乃徒御勞及茲夏潦漲弭節俯江臯試命具
舟楫聊以釋煩囂巨浸與天永東流日滔滔來檣與去
檣倏忽馳千艘進舟枕席間舟子巧所操江山遞隱見
景物資遊遨頗同謫仙人醉著宮錦袍長嘯倚桅樓軒
然詠離騷心隨八極遠身逐秋鴻高風帆擘巨浪大艣
駕雲濤百里須臾間千里不崇朝快哉可以賀把酒持

蟹螯

彭蠡

神禹治水江為最邈迤逶蛇鍾作滙泓澄不獨陽鳥居
浩蕩端使羣川會羣川已會江不湍朝宗到海東南安
烟收雲歛望不盡眼界始知天宇寬世傳揚瀾并左蠡
無風白浪如山起我今謫官此中行何事恬然風浪止
陽侯也自可憐生不學世人皆世情好風已借一帆便
霽色更增雙眼明晚來畫舸鳴六櫓超忽千山如脫兔

波心突兀見星宮雲際崢嶸望廬阜世間此景良不多
洞庭三峽真么麼共浮大白期一醉對此不飲當如何

遊落星寺

一氣升沉誰所肇隕星為石古不少羣川會處渺無涯
墜此精堅鎮江表坐令釋子開梵宮棟宇規摹浮玉小
窈窕樓臺四面通洶湧波濤千柱偃我來端是好幽奇
一葉飄然陵潏渺初疑牛女在銀潢更訝靈槎經畢昴
星房月殿夜沉沉水色天容秋杳杳恍如清夢到天門

欲駕鸞輪憩蓬島塵世喧譁那易得幻境去來何日了
心閒境寂付幽人衲被蒙頭任昏曉

望廬山

多山不省廬山面江上初從望中見秀骨蒼顏五老人
顧我欣然如素善香爐峯頂紫烟浮瀑布遙看銀漢流
雲舒霞卷互明滅倏忽變態無停畱却疑清夢尋丘壑
風物何為宛如昨縱令真是夢中看夢未覺時良不惡
平生所願今乃償寬著日月遊山房青鞋布襪久已辦

百錢掛杖聊徜徉

韓德全以小舟相迓於落星寺下

故人一別兩寒暑鴈斷魚沉杳何所
那知迎我落星傍一葉凌波聽掀舞
曾中耿耿初自若身世悠悠乃如許
且須酌酒澆肺肝慎勿開口論今古

晚出南康遊廬山

捨舟星子渚遂作廬山遊空濛杳靄間
十里松桂秋草木吐香潤泉石交橫流
乃知山中物一一皆其尤嵐逼

空翠濕峯高紫烟浮心閑雲出嶺眼淨龍還湫月壑夜
窈窕風林晚颼颼稍聞鐘磬聲迥覺梵宇幽平昔念清
賞孰云今乃酬似非人間境須向物外求顧揖雖不暇
吟哦浩難收聊將詩紀行一洗他年愁

過玉澗道人草堂

道人妙彈琴能作醉翁操人亡琴亦亡頗為識者悼草
堂玉澗邊蕪沒已秋草總帳鶴驚空藥杵香餘搗竹光
淨如洗桂子寒不掃松風肅泠泠猶想琴聲好

五老峯

五峯秀出如五老鬚髮蒼然長美好問之不肯道姓字
儼若子房從四皓商山採芝亦已久漢庭辟穀何其早
優游相與定儲皇攜手江湖共幽討化為峯石寄山巔
下視塵寰真電掃衣冠想像猶偉然容貌至今初不槁
祇因明月見當時間有白雲來問道逝將築室近峯前
歲晚相依得相保

羅漢寺

寺有玉
澗金池

梵宮臺殿古松桂碧參天玉澗碎寒石金池開小蓮循
渠窮水脉策杖到巖巔漸入廬山境從參五味禪

自羅漢院欲遊尋真觀雨作不果遂次栖賢聞尋
真景物尤美留為異日不窮之賞賦詩紀之

羽人之宮鄰五老杖屨欣然事幽討那知一夜雨翻盆
山路難行愁滑倒世間違意常八九萬事皆然寧自保
山靈豈是祕幽奇欲結清歡故相惱傳聞景物冠廬山
小殿飛樓更精巧古潭搖蕩明月光綠蘿青松覆煙草

屏風九疊雲錦張古來詩句謫仙好山中道士不出門
玉杵金丹手親搗我方放浪謝冠裳未覺山林跡如掃
真遊儻有不盡緣容我他年來訪道

栖雲庵

羅漢長老為退居之地
求予名之有大蛇其後

禪老幽棲地雲峯尺五天江湖縈縞帶世界廓青蓮說
法三乘外藏身萬象巔潛虬蟠不去應聽祖師禪

三峽橋

我昔曾作雲安行道逢除書還玉京至今遺恨不一到

與聽三峽流泉聲此來又謫武昌去廬山當道欣所經
栖賢寺前小三峽拭目便覺增雙明黃牛明月坐中見
瞿塘艷潁森相迎山寒草木鬱葱蒨逼耳似聞猿猱鳴
懸崖亂石互迴轉震吼正坐不得平珠跳雲沸巧深射
晴晝雨雹驅雷霆壯哉造化融結此故使水石相喧轟
妙音流出無盡藏乃與衲子門庭爭飛橋鼎負跨虛碧
面對五老峯崢嶸我來雲物為開霽當暑萬壑松風生
提攜更得二三子杖履不辜丘壑情垂餅得水不敢漱

老坡舊約今尋盟

萬杉寺散珠亭

一派飛泉落坐隅
跳波沸石散成珠
道人諦看空濛際
顆顆圓明定有無

諸刹皆以石渠道水有至十餘里者感之賦詩

廬阜秀江南凝結盡雲母泉源乃雲腴甘冽固其所懸
為瀑布垂巖作龍鸞舞交流澗谷中厥味皆鍾乳僧坊
有能事致遠勞汲取鑿石為通渠計里不計步回環繞

山麓高下映簷廡蜿蜒虹腰轉溜溜螭頭吐沛然飲濯
餘灌溉及園圃誰將創物智作此濟衆祖慙勞逸則永
心一力乃舉豈惟小物然萬事盡如許吾道何其哀寤
寐慨思古

梁谿集卷十七

欽定四庫全書

梁谿集卷十八

宋 李綱 撰

詩十四

在湖外作五十七首

谷簾泉

再遊廬山感懷

開先寺漱玉亭

瀑布

簡寂觀

歸宗寺四詠四首

偶成

靈湯

廬山戲成

圓通寺與覺老步月

諸刹以水激磴磨殊可觀

子弟遊天池余以病不果往

戲贈東林珪老

西林寺

同許右丞遊東西二林

許右丞詩附

太平觀植瑞香可愛恨不及其花時

白公草堂

琵琶亭

過淵明故居

德安食枇杷

雲居勤老以書見邀不果往

憇潭田精舍

詩佚

聞子規

雲巖月林堂成古風

詩佚

戲題墨梅

兜率寺

玉溪亭

過苦竹嶺二首

通城送李言弟二首

李言送至湖外往無為挈姊旅襯

寄王周士絕句二首

寓居僧舍東軒池蓮盛開珪老有意見過

張子公以圓鑑見寄作詩答之

早起

有感

小塘

飛雲

讀留侯傳

東軒夜坐

浴罷和東坡韻

次韻謫居三適

懷季言弟并簡仲輔叔易

次韻張子公見寄二首

余久不飲酒雨後晚涼悠然獨酌戲成

葉落

無因再遊道林嶽麓

谷簾泉

世稱谷簾第一惠山第二

甘泉多自名山出世品谷簾為第一溜澗之水不易辨
臆說詎敢評得失廬山深處為谷簾度嶺穿雲費時日
道人裹飯時一到敲火烹茶資野逸坐令僕隸致餅甕
是非誠否良難詰世間知味定何人食蔗多謂甜於蜜
居然真偽相混殺往往循名因去實何似家山陸子泉
石縫迸出蒼龍澗山中空洞乳滿腹一派下作梁谿源

清甘著舌久不散持以瀹茗增芳妍華堂石甃與覆護
好事汲取肩相駢有時置酒飲其上醉滌肺腑塵煩蠲
絨題寄遠無偽者貴賤均飲初不偏彼如幽人在空谷
此若佳客臨風前未須細較味優劣且問所處誰為賢
余幼嘗一到廬山再遊已三十年矣感懷二首

夢想廬山三十秋却因謫宦得重遊禪林處處逢清賞
山路人人識故侯絕嶺半將雲幕覆飛泉長作玉虹流
平生丘壑真吾志一洗胸中萬斛愁

香爐峯頂紫煙凝三峽橋邊雪浪驚不為迂疎成遠謫
豈能蕭散箇中行雲霞映帶松蘿色殿閣深嚴鍾磬聲
回首世緣真夢幻故應長此寄浮生

開先寺漱玉亭

未遊漱玉亭先誦東坡詩手持芙蓉跳下清冷中疑非
謫仙不能為此詞後翁三十年我亦遊於斯飛橋已堙
沒故跡多推移空餘高巖與深谷落日慘淡松風吹白
龍依舊出青峽散沫下作清漣漪古來陵谷會遷變况

乃景物資人為雲間濫濫吐寒月清光不減翁當時相望一世發孤笑坐使萬古生長悲

瀑布

我昔遊太華矯首望仙掌瀑布如懸河斗落五千丈空濛雨雹飛瀕洞巖壑響及觀廬山瀑未覺快清賞飛泉出山腰半派隱層嶂沈吟謫仙詞其或過所獎傳聞山之巔峯岫列屏障銀河落九天噴薄殊異狀倒掛三石梁無乃在此上逝將隨羽人裹足一同往懷哉不可得

空積青霞想

簡寂觀

陸脩靜
故居

高士不可見雲鄉空舊居煙嵐飛瀑外露石禮星餘松
老未歸鶴沼深清見魚何人得丹訣應有枕中書

歸宗寺四詠

紫霄峯
墨池

孤峯秀拔翠堯峯峯頂虛無是紫霄從此上賓朝帝所
直須穩跨玉龍腰

溪流宛轉若翔鸞翠色涵虛特地寒底事舞餘窺碧沼

祇應誤作鏡中看

右軍真是墨中仙到處成池豈盡然祇有此間疑可信

白雲書法至今傳

羲之受書法於白雲先生今廬山白雲洞也

光射蒼巖石鏡屏我來一現豈無情誰云顯晦知時節

長伴空山寒月明

偶成

東坡題漱玉亭石柱云玉局散吏來遊而余領洞霄

洞霄更上紫霄峯漱玉亭遊玉局翁人物風流何可並
山林趣舍畧相同是非論定千年後身世塵勞一夢中

我是騎鯨謫仙裔赤鯁相逐御清風

靈湯

石甃靈湯列道周玉池金屋未相侔滌塵時有幽人到
不與驪山共一流

客言廬山往年之盛今不逮遠矣戲成此詩

福地禪林海內無盛衰亦與世緣俱祇應泉石不知老
長伴煙雲得自娛種杏仙家今寂寞獻花衲子亦乾枯
我生頗恨來遊晚也勝不來空看圖

圓通寺與覺老步月

石耳峯前松檜香月華天影夜茫茫道人試道依溪水
何似曹溪一派長

諸刹以水激磴磨殊可觀為賦此詩

疊石壅寒派湍流瀉迴溪誰將方便智成此妙圓機輪
輻互高下波濤鬱翻飛磨牙遞旋斡磴杵紛昂低玉粒
已粲粲瓊花亦霏霏雖存機械巧利澤成博施試語漢
陰老使知渾沌非惟當善用心功與天地齊

子弟輩遊天池余以病不果往

雲山積翠倚穹蒼
仙聖靈蹤寫上方
瑞像世傳藏錦繡
神光人說似清涼
心安是處皆歡喜
眼正無時非吉祥
我病未能尋勝境
慙慙為爇一爐香

戲贈東林珪老

我遊廬阜南山北
師住二林東院西
試問遠公求作佛
何如陶令醉如泥
苦邀名山同蓮社
笑送幽人過虎溪
千載風流久寥落
更煩拈出與提撕

西林寺

東林大禪苑殿閣傑以雄西林乃律居僧房小玲瓏泉
流庭廡間宛轉如鸞龍花竹深窈窕松蘿鬱青葱縱觀
魯公書遠揖峭直風餘碑雖崢嶸一掃凡馬空安得數
椽地介居二林中當有逵公流策杖時相從

翰方舍舟九江適會僕射相公道過二林得非所
期相顧歎息輒為長句用志勝遊且以叙別

公為逐客向何州我亦求家賦遠遊邂逅二林成晤賞

寂寥千古想風流
玉銜溪堰涼吹榻
葢偃松蘿翠蒲樓
明日分攜重回首
鑪峯空見紫煙浮

道出廬阜偶值崧老右丞同遊東西二林蒙示佳

篇輒次來韻

迂疎又復謫南州
假道江山得勝遊
杖履欣逢長者轍
笑談同訪遠公流
風搖杉檜驚寒夢
煙鎖峯嵐繞翠樓
回首中原意蕭瑟
此生飄泊任雲浮

太平觀道士植瑞香於簷廡間可愛頗恨不及其

花時為賦小詩

道人心境閑種花白雲鄉交柯碧珊瑚蕤蕤衆葉光弱
質資灌溉孤根怯清霜治畦簷廡間晏溫借朝陽我來
恨太晚不見花吐房想像正開時淡子兼微黃濯濯炫
秀色霏霏懷天香空餘風露枝璀璨繞迴廊地靈草木
潤長與蘭蕙芳明年花更好矯首遙相望

白公草堂

樂天平生不可及謫官乃作廬中集香爐峯下結草堂

石屏紙帳隨時給維摩丈室亦何有
天女散花空結習
何須江上聽琵琶
泫然淚滴青衫濕

琵琶亭

去年假道潯陽城
扁舟夜泊琵琶亭
却憶當時醉司馬
送客江頭秋月明
今年謫官又重到
掃地乃緣蜂寇經
軒楹回首已不見
况欲更聞絃索鳴
西風蕭蕭蘆葦響
月色下照江波清
祇應風月長不老
坐閱塵世猶流萍
我生多病苦憂患
未能忘世那忘情
移船相近夜悄悄

側聽疑有檀槽聲

過淵明故居

捨權湓浦城稅駕柴桑里緬懷靖節翁衡宇茲避世乞
食雖甚貧折腰肯為米陶然傲羲皇獨得醉中意三徑
不願餘五斗聊自誅優游晉宋間俯仰無可愧若人骨
已朽凜凜有生氣斜川尚環流層城亦秀峙如何高世
士廟貌乃頽圯誰將一觴酒薦此菊與杞朗詠歸來辭
感嘆成坐起

德安食枇杷

故人餉廬橘煙雨江上村芳津流齒頰核細肌豐溫誰
為黃金彈偏宜白玉樽返源旋味處寂寞自無言

雲居勤老以書見邀不果往戲作此頌寄之

吾師脫浮玉振錫來雲居江邊波浪已遠去山頂風雷
應晏如我來問津師草草咫尺雲岑悵難到師旣拘折
拄杖不出山我亦把定韁繩不下道試將此意示叢林
撫掌呵呵同絕倒

聞子規

江南四月五月時空山月夜啼子規
勸我不如歸去好我方遠謫何時歸
中原杳杳暗鋒鏑縱使得歸何所益
不如且住碧山中為憑青鳥通消息

戲賦墨畫梅花

道人畫手真三昧力挽春風與遊戲
露枝煙蘂忽嫣然自得工夫畦徑外
由來黑白無定姿濃淡間錯相參差
炯如落月耿寒影翳若宿霧含疎枝
羣芳種種徒繁縟

脫畧丹青尤拔俗妙質聊資陳氏煤幽姿好伴文生竹
世呼墨竹為墨君此花宜稱墨夫人鉉華不御有餘態
世間顏色皆非真年來妙觀齊空色天花時露真消息
試煩幻出數千枝不費梁谿一丸墨

兜率寺

隨意寓禪房小軒風露涼山幽雲傍戶林迥月窺牀竹
色曉增翠桂花秋欲香無人知此意天影碧茫茫

玉溪寺

玉溪何日寺古佛亦塵埃高閣雲初卷小池蓮半開竹
風清枕簟松露滴莓苔寂寞溪邊路幽人自往來

過苦竹嶺二首

絕嶺橫鳥道江湖從此分沈吟洞庭野悵望具區雲去
住本非我別離空念羣子歸啼苦竹腸斷不堪聞

今日江湖境雙眸嶺上明山光隨地好秋氣逼人清隴
水初分處雲鴻欲別情離羣古來有嘆息未休兵

次通城送季言弟還錫山二首

半載相從作遠遊，物華苒苒又新秋。
江南山水共清賞，湖外風煙成獨留。
家遠為傳安穩信，時艱增重別離憂。
宮渚此去無他地，悵望自登黃鶴樓。

陸離長佩切雲冠，澤畔行吟且紉蘭。
我已安心為逐客，子今何事亦拋官。
江湖鴻鴈初寥落，風雪鵲鴒相急難。
歸去家山見諸季，為言努力且加餐。

季言送湖外欲往無為，挈其姊旅櫬歸錫山，憫其
勤贈此一絕。

送我謫官遷姊殯人生如汝亦勞哉他時寄骨西江上

煩汝闕得得來

寄王周士絕句二首

偶然一病便休官萬石巖中處已安底事書來猶剩語
也知習氣掃除難

年來百念冷於灰夢到江湖又一回從此故人音問近
洞庭秋色鴈初來

寓居通城僧舍東軒池蓮盛開竹庵珪老有意見

過戲贈此篇

道人庵外萬竿竹何似小池千葉蓮月白風清誰共此
心閑境寂兩條然好拋筠粉娟娟淨來看荷珠的的圓
飛錫儻能真過我直須趁取晚霜前

張子公以圓鑑見寄作詩報之

我觀大圓鑑瑩澈靡瑕垢清光溢寒蟾碧井窺古甃冰
池絕埃塵玉壁無肉好不知何年鑄歟識雜篆籀冷然
照肝膽况燭須眉秀英英張公子輟贈意獨厚使我正

衣冠更似別妍陋嗟予罹百憂半世困馳驟蒼浪齒髮
衰已覺成老醜幸茲置寬閑閉戶念往咎冠歌與珮落
顛倒散襟袖平生遭謗讒白黑坐分割逝將杜德機漸
可塞智竇豈徒齊美惡端欲一昏晝鑑焉何所施無乃
虛授受聊持戲鳳匣藏此蟠螭紐精光祕不露猶使魑
魅走詎逃鸚鵡形時作蛟龍吼君看方寸間此物誰蔽
覆靈臺湛虛明廣博含宇宙纖毫莫凝結萬象悉籠囿
寧隨古今移不逐面目皺人人各具足一一謝雕鏤無

塵安用拂表裏自通透諸佛亦何為四智此為首祖師
持出遊法器久已就那將清淨眼更入煩惱鄣隨緣夢
幻年坐閱蠻觸鬬本來妙明心一念證無漏持此還寄
君試問承當否

早起

秋曉淒然枕簟涼小牕殘月尚臨牀追尋夢境烟雲散
起傍荷花風露香慨念闕河心黯黯諦觀身世意茫茫
樽中有酒聊須醉造物於人自叵量

有感

三年再謫墮江湖何啻經行萬里餘環繞真同循磨蟻
羈窮更類局轅駒自憐許國心猶壯却笑謀身術已疎
二聖未還民未靖尚思痛哭奏囊書

小塘

誰使精廬鑿小塘坐令天女試新粧風搖翠蓋珊瑚響
露裛紅衣冉冉香暴罷雨聲來絕巘夢回月影上脩廊
我生本自無根蒂觸處為家殊未央

飛雲

飛雲遊碧虛天矯龍蛇勢因風態無窮抱日色增麗飄然欲安歸出岫非本意為霖竟何成跂望增歎喟

讀留侯傳有感

秦人失鹿解其紐羣雄競逐死誰手天方注意隆準公故使留侯作賓友圯上老人親授書言從志合真其偶捕取項籍如嬰兒指麾諸將猶獵狗運籌決勝帷幄中楚漢存亡良久誰言劉季田舍翁祇聽人言本無有

但能信用子房謀何妨抱持戚姬日飲酒

東軒夜坐

冉冉流年催白頭此生那向此淹留天高露下物華繡
月澹風清僧宇幽河底光芒螢照水草間悲怨蚓吟秋
夜涼人間家千里別是羈臣一段愁

浴罷追和東坡韻

華髮短且稀無事蘭湯沐及茲秋暑闌頭垢資一浴平
生冠裳汗往咎不可復聊將清冷泉濯此空洞腹荒山

新易採巨斛水良足融融氣通膚爛爛光溢目惝然勺
用瓢何必池甃玉呼童為肥背自勝飛燕沃振衣絺綌
涼晞汗風前竹却來就繩牀一枕睡初熟忘世安用愁
拋書且休讀夢中期汗漫萬里歸一矚吾生真寄耳來
者亦何卜沛然乘天遊無心且緣督

次韻謫居三適

旦起理髮

未能運河車上泝泥丸宮鬢髮忽已華颯若冒雪松清

晨起自理濯此萬里風蕭蕭櫛齒快淅淅氣脉通呼兒
助千徧緩手無忽忽我生本疎懶誤墮軒冕中野馬就
羈勒何如霧生鬚握髮諒未能散髮聊與同金丹變鬢
色緣合亦易逢逝將弄雲海一訪安期公

午憩坐睡

涉世幾滅頂欲為多掣肘功名如浮雲於我亦何有惟
茲華胥國風土諳已久坐中可斷取聊試維摩手昏昏
一卷書兀兀三杯酒飄然到其鄉自覺樂而壽嗟我蒲

柳姿未老先已朽何嘗慕管蕭但欲師廣受未能脫羈
束洗濯愈瑕垢已矣姑兩忘蘧蘧學莊叟

夜卧濯足

養生貴養足不假衾與裯温温斗水間可以解我憂月
露夜寂寂風雨寒颼颼呼童具盆湯足若雙蜺投老來
嗜坐卧突兀鷹在韝有時起游行恍訝煙雲浮自從飽
滌濯此病良已瘳虛堂日千轉輕捷如沐猴

懷季言弟并簡仲輔叔易

我昔謫沙溪爾送至虎丘相携觀劒池共坐蒼崖陬霜
寒草木哀肅肅天地秋慷慨論世故豈復知離愁中間
謫雲安爾病家山留獨與仲及叔分攜浙江頭潮聲來
海門風雨助颼颼銀濤撼天起泛此一葉舟及茲謫武
昌爾復從我遊回環溪壑間渺若雙沙鷗長江快清曠
廬阜探竒幽行盡江南山始次湖外州傳聞浙郡兵盜
用官庫矛夜深赤白丸殺吏起相讎懷家動歸心觸熱
遽還輒作別今幾時此情浩難收塊處誰共語把酒無

與酬憑高欲望遠獨上黃鶴樓吳越天杳杳風煙晚悠
悠顧嗟禰處士坐困鸚鵡洲天驕氣方橫盜賊起如蝨
中原暗鋒鏑江漢屯貔貅爾歸議遷徙已有定論不黃
屋尚飄泊吾敢懷燕休但願復相見一解無窮憂泫然
念蒼生豈為吾身謀

次韻張子公見寄二首

處世何殊夢裏人大千沙界幾迴巡萬緣盡處方為我
一念生時已是塵幻境是誰從出沒舌根何物辨甘辛

安心須到無心地始契如來清淨身

功名身外兩悠悠有意功名已可羞與世浮沉非我意
觀時進退豈人謀不能為國關百里祇欲歸耕老一疇
禍福死生皆默定初非捨去亦非求

余久不飲酒雨過晚涼悠然獨酌戲成此篇

崎嶇歷落真可笑飄泊流離初不羞蒼髯華髮老張鎬
火色鵞肩窮馬周身長九尺安所用命酒一斗聊銷憂
醉中起舞頗自得慷慨不知風雨秋

葉落

鏗然一葉已驚秋
况復紛紛巧見投
振槁不禁風淅淅
催寒長共雨飈飈
洞庭波起初微脫
雲夢霜高浩不收
舞砌穿帷不須掃
蕭騷從伴逐臣愁

去歲寓長沙遊道林嶽麓真天下絕景也今相去
不遠無因再遊賦詩見意

衡山之馭湘水濱
道林嶽麓天下少
蟠岡複嶺相掩重
石磴松門遞縈繞
經行多在煙靄間
臺殿半開雲木杪

衲僧宴坐禪寂餘朝磬暮鐘清香杳憑高曠望楚天濶
志氣已逐飛鴻矯橘洲楓浦指顧中俯視更覺長沙小
風檣浪舶千艘屯丹樓粉堞百雉繚蒼茫曉色散平川
點綴殘霞映疎蓼從來篇翰誰最優沈宋杜韓爭表表
古今塵跡散煙雲獨有斯文傳不了隔年清賞回首空
斯欲再遊真渺渺蒼梧九疑雲漠漠青草洞庭風嫋嫋
有時幽夢一到之覺來枕席清秋曉人間萬事不由人
安得忘情逐猿鳥



梁谿集卷十八

欽定四庫全書

集部

梁谿集卷十九
二十

詳校官庶吉士_臣張溥

侍讀_臣孫球覆勘

總校官知縣_臣楊懋珩

校對官中書_臣潘奕雋

謄錄監生_臣陳太初

欽定四庫全書

梁谿集卷十九

宋 李綱 撰

詩十五

在湖外作
三十六首

五哀

并序

黃陵廟

望九疑

望洞庭十首

促織

秋風二首次子美韻

次韻艾宣畫四首

西風竹

畫草蟲八物

讀二疏傳

著迂論有感

建炎行 并序

五哀詩 并序

湖湘間多古騷人逐客才士之所居故其景物淒涼氣俗感慨有古之遺風余來武昌慨然懷古作五詩以哀之

楚三閭大夫屈原

楚懷聽秦誑身作咸陽鬼當時屈原爭坐困椒蘭毀襄王復不悟遠作江南徙行吟沅湘間形槁顏色悴著書

稱離騷風雅齊厥理鵠鶚况小人鸞鳳喻君子眷眷不
忘君一篇三致意紉蘭採杜若冠佩空自偉舉世混濁
中誰與同樂此忠臣會遇難千古共一軌人情疎骸亮
物能使軟美存亡反覆間悔及良晚矣嗟嗟屈子心芳
潔疇與比日月可爭光塵垢安能滓聊從太史卜肯逐
漁父醉甘葬魚腹中懷沙汨羅水千秋身後名芬馥同
菰芷夫豈椒蘭徒據勢長不死

漢梁王太傅賈誼

賈生公輔器弱冠遊漢廷高論帝王畧妙極理亂情出
意對詔令驚倒諸老生從容畫籌策籍籍飛英聲是時
漢初定頗雜秦霸稱力還治古制物物與正名改朔易
服色庶幾禮樂興儀章悉草具輿議當公卿豈知絳灌
徒譖毀如建瓴天子疎不用謫去長沙城翩然渡湘水
投書弔屈平棄鼎寶康瓠鉞刀鈍青萍微言豈悼屈聊
復以自評長沙地卑濕安得壽且寧及觀鵬鳥賦頗覺
生死輕晚奉宣室對夜半前席聽文帝豈易遇所言畧

施行雖不位卿相儒者良已榮梁王墜馬死泣涕亦傷
生受任乃如此孤忠本精誠奈何君臣義澆薄返不明
緬懷古人心使我氣拂膺

漢處士禰衡

禰生抱逸韻乃是古之狂負才頗傲物齒少氣方剛懷
刺遊許下漫滅竟摧藏肯從屠沽兒借面與弔喪偉哉
孔文舉國寶借路傍上書薦一鶚欲使觀翱翔振翼雲
漢間永垂虹蜺光飛兔與腰裏滅沒不可望觀其慰辭

薦器識豈易量平生輕魏祖縱口成否臧召令為鼓吏
閱試當改裝蹀躞初散步摻搗作漁陽聲節既悲壯容
態隨低昂岑牟與單絞裸袒易故裳卻來坐軍門畫地
聲琅琅曹瞞點如飛嗜殺猶虎狼縮手不敢動送與劉
及黃娛賓賦鸚鵡節奏陵笙簧援筆不加點粲然已成
章高才竟為累蘭麝空餘香至今鸚鵡洲葭葦秋蒼蒼
醜哉殺士名千古不可忘

唐中書令褚遂良

貞觀萃羣英實為太平基諸公初侍書遂以牋亮知諫
疏屢獻納對揚竭論思翩如丹山鳳來為簫韶儀飛鳥
自依人此言已堪嗤更云譖劉洎厥理尤足疑賢者雖
已矣可以此心推薰蕕難共器梟鸞不同棲故令敬宗
輩汙染成瑕疵我觀永徽間武氏盜政機禍端始牀第
樂使國祚移當時河南公力諍伏丹墀頓首願還笏正
身田里歸義氣動人主回天初庶幾鄙哉英公勸一言
遂成非坐令北鷄晨啄喪靡有遺元勲顧命老遠竄湘

江湄茫然不復召詎憶抱頸時卑濕所不堪須髮盡成
絲至今潭府帖志士生長悲

唐工部員外郎杜甫

子美以詩鳴今古無對手當時謫仙人長句頗先後精
深律切處故自非其偶而况郊島徒何敢窺戶牖有如
登岱宗衆山皆培塿又如觀武庫劒戟靡不有高辭婉
丘墳古意篆蝌蚪蒼蒼雪中松濯濯風前柳雲煙紛卷
舒雷電劃奔走澹然衆態俱沾丐隨所取平生忠義心

多向詩中剖憂國與愛君誦說不離口飢寒窘衣食容
貌村野叟自以稷契期此理人勝不中興作諫臣戎馬
方踐蹂上疏救房琯亦足知素守一跌不復振造物意
豈苟欲使窮吟哦專志如矇眊辛苦盜賊中妻子或顛
仆布衾冷似鐵晨爨乏升斗冒雪斲黃精呼兒理魚筍
蕭條秦隴間不廢詩千首依巖遂入蜀幕府備賓友草
堂浣花溪頗復事南畝亂離又飄泊累若喪家狗雲安
麴米春巫峽風土陋扁舟下瞿唐留滯湖湘久家事竟

何成丹訣空繫肘淒涼未陽縣醉死竟坐酒雖煩微之
銘不返鄴杜樞誰將樽中渌一酌泉下朽詩篇垂琳琅
長作蛟龍吼

黃陵廟

湘妃廟貌枕江湄不見當年鼓瑟時玉佩風搖雲冉冉
翠帷煙濕草離離淒涼清淚留班竹寂寞深林叫子規
斷簡遺編杳難考無人為立退之碑

望九疑

洞庭渺漭蘆葦秋九疑聯綿煙靄浮重瞳一去不復返
蒼梧雲物空疑愁兩階干羽久寂寞千古夷夏相仇讎
安得垂衣轉琴軫薰風為解吾民憂

去歲道巴陵登岳陽樓以望洞庭真天下之壯觀
也因誦孟浩然氣蒸雲夢澤波撼岳陽城之句
追古今絕唱用以為韻賦詩十篇

登樓窺洞庭滄波渺無際波間起飛龍慘澹帶雲氣雲
雷倏變滅天水共澄霽矯首望君山鏡面青螺髻

地枕江湖闊秋來多鬱蒸山城少見日霧雨長冥冥今
夕定何夕月華風露清於此興不淺欄干聊復憑

秋色到極浦層空靄行雲長劒撫玉珥欲降雲中君桂
旗澹偃蹇風馭何繽紛淹留豈予願沐浴空蘭薰

此身墮江湖恍若在清夢夢中亦何為思古亦長慟心
馳關塞遠目與飛鴻送賈客不知愁淒然笛三弄

江湖渺無涯悵然懷震澤地分吳楚遠天共雲水白鱸
魚正堪膾蟹螯亦可擘何日歸去來秋風思遷客

西風木葉脫洞庭水層波蘋芷滿洲渚有懷憂思多眇眇帝子愁欲降山之阿蘭蓀奠桂酒浩唱聞九歌

湖光如鏡平風雨一搖蕩蜿蜒舞翠蛟洶湧疊銀浪帆檣走陣馬勢出霄漢上吾生幸可惜何事魚腹葬

濯足洞庭波秋高翠增岳美人渺何在使我懷抱惡悠悠江湖深坐阻闕山邈採蘭亦寄之終朝不盈握

重湖望不極秋色藹殘陽洲渚雲沙白菰蒲霜葉黃飛帆適沅澧迴鴈過瀟湘楚客經行處依然蘭芷香

江湖秋日暮遠客若為情宿舸沙邊纜征鴻雲外聲星
河搖倒影鼓角起江城去國同王粲登臨百感生

促織

促織哀吟不自勞草根牀下夜蕭騷我為逐客宜無寐
何事勦勦至日高

秋風二首次子美韻

秋風淅淅吹南山胡騎憑陵窺漢關金輿玉輦幸沙漠
兩載于今猶未還中原道路盡豺虎擇肉漸覺來荆蠻

運籌帷幄策安在母事推注移文間

秋風淅淅吹客衣日光奄奄寢已微
自我行吟楚澤畔三月不通家問稀
清霜冷落歲將暮僕御偕問何時歸
我今萍梗任飄泊懷土却悟從來非

次韻艾宣畫四首

竹鶴

磊落胎仙誰最宜此君節操凜霜威
琴心試與彈三疊從看婆娑舞羽衣

黃精鹿

黃精苗盛雪初融
疊疊峯巒紫翠重
巖前雙鹿卧底事
祇應春日長新茸

杏花白鵲

春入羣芳此最妍
露枝煙葉裹成團
不知閑客來何處
獨傍花枝仔細看

蓮龜

紅粧翠蓋曉參差
水面浮游有戲龜
誰道千年解巢葉

也知曳尾已多時

西風行

西風隕高梧秋暑退殘熱豈不欣微涼寤歎驚急節歲
華聿云暮露氣繁霜結干戈隨凝陰敵騎壯勝鐵邊防
久凋殘河洛據戎羯中原無長城何以限逸越傳聞今
年春關輔已蹙血強兵健馬區乘間肆陵蔑况茲柔脆
鄉豈復勞翫齧江漢非不深天險為人設要害無重兵
一葦自可絕恬然不為備廟筭豈有說翠華果何從大

計宜早決緬懷沙漠寒矯首望漢月杳無鴻鴈來寧不
野鼠掘何時金鳳輦復返蒼龍闕羣生有安堵國恥稍
一雪努力肉食謀傍觀心已折

畫草蟲八物

蚊

所志惟一飽聚聲如雷車秋來腹長飢撲撲喙作花

蠅

情態真可憎畫成因誤墨薨薨亂雞鳴慘慘變白黑

蜂

杪忽腰如壺聯綿窠若屋毋輕懷袖間防此蠆尾毒

蝶

粉翅搖春暉翩翩自來往勿貪花草香觸此飢蛛網

螳螂

飄飄綠衣郎怒臂欲當轍君王求勇士嘉爾能仗節

蜻蜓

雙睛碧珠瑩四翅青羅薄但知逐飛蚊不復顧黃雀

螻蛄

戚戚鳴歲暮不知有春秋肯信鯢與鵬同作逍遙遊

絡緯

露下草根冷戛然長悲鳴誰知兩股間能作無窮聲

讀二疏傳

都門供張設祖道冠蓋如雲聲浩浩送車百兩知為誰
太傅少傅同歸老道傍觀者為泣下賢哉大夫能自保
酒酣禮畢辭決去脫若林泉放魚鳥當時宣帝重法律

視遇公卿同隸阜楊惲所坐祇語言趙韓之誅亦草草
故令二傳動歸心未必筋骸果衰槁父子相隨出漢關
歸來自覺故鄉好黃金散盡宴親賓日治酒殽供灑掃
肯將田宅遺子孫清白傳家最堪寶寂寥千載想風流
知止不辱何其早

著迂論有感

長笑梁谿翁平生有餘拙於今欲行古無乃亦癡絕施
之廊廟間放步足已跌下帷更潛思又復廣陳說從來

坐言語得謗今未歇曾不少創懲饒饒祇強聒惟堪覆
醬甑詎足議往轍掉頭謂不然此理君未察立言與行
事垂世初不別身窮言乃彰貽範有前哲周文拘羑里
易象乃成列仲尼道不行褒貶代賞罰屈原因椒蘭澤
畔採薇蕨離騷體風雅光可爭日月虞卿罷趙相梁魏
頗屑屑世亦傳春秋端為窮愁設聖賢垂簡編往往因
憤發避謗不著書陸子良已點區區禍福間何足議宏
達泛覽古人心一一可坐閱大略觀規模微情析毫髮

幽光發干將潛匿戮饕餮會有知我人玩味為擊節安
知千載後觀樂無季札豈能繼潛夫粗可做荀悅子雲
方草玄解嘲何可缺

建炎行

并序

余去歲夏初自長沙聞尹京之命率義旅入援王室次
繁昌得元帥府檄審寇破都城二聖北遷號慟幾絕至
當塗見赦書上登寶位且喜且悲意欲一到行在覲新
天子道曾中所欲言者即丐歸田里此其志也行次淮

楚間忽聞已告廷除拜荷特達之知感極而泣以六月朔抵南都有旨執政出迓賜燕於金果園具奏丐免即入城是晚召對內殿叙陳國家禍故上嗣位慰天人之望泣謝首被選用顧材力不堪弗敢當乞遴擇足以副公議者上慰勞久之即遣御樂押赴都堂治事翌日再對復力辭三上章表皆優答不允是時偽楚張邦昌以太保同安郡王領三省事五日一會都堂即建言邦昌僭竊不宜與政臣不可與同列凡受偽命者皆宜正其

罪以為臣子之戒具奏十事皆當時急務度能從乃敢受命有旨付三省施行又與執政廷辨至泣拜以辭上感動始罷謫邦昌與受偽命者翌日乃受告因為上規畫所以捍禦金寇奉迎鑾輿之策且謂河北河東國家之屏蔽雖頗為寇所陷沒然其兵民戴宋之心堅甚朝廷不議救援使人力屈而附賊為患非細於是薦張所招撫河北傅亮經制河東二人者皆有將帥材具甲兵錢糧而遣之又請車駕一至京師見宗廟慰都人之心

度未可居則巡幸南陽駐蹕示不棄中原而西通關陝
可起兵馬東通江淮可運糧餉南通嶺蜀可取貨財北
援三郡兩河與賊爭利天下形勢莫便於此有旨遣使
經畫又勸上益募兵買馬繕器仗修軍政擇將帥置帥
府要郡以經畧天下是時劇賊李昱擾山東杜用起淮
南李孝忠亂襄皆遣將討平之其餘降者十餘萬皆分
隸諸將使渡河討賊纔兩月間威令稍振竊以奉令承
教可幸無罪中興之功庶幾可成不意同列者害之陰

以巡幸東南為安動上意八月五日告廷遷左僕射既
命二相矣於是顯沮張所而罷傅亮連數日爭之不可
得則丐罷政奏上以謂方朝廷艱難不敢充位備員以
虛負天下之責章三上再押入一對後殿力求去上度
不可留乃除觀文殿大學士提舉杭州洞霄宮泛舟東
歸已而言者交章詆在相位施設不當且誣以傾家貲
攜叛卒聞者駭愕賴天子睿明有以察其不然姑褫職
俾以宮祠居武昌聞命即上道適瀕江盜賊擾攘間關

道路踰半年始達湖外追思前事恍如夢寐而連年奔走繚絡萬里初不知其所以然夫出處去就大臣常事不足道也然金人今春果擾闕輔蹂踐京東西河北兵民叛為盜賊皆如所料鑾輿遠幸未有可還之期翠華飄泊未有定居之所生民未休息中國未乂安此臣子之所夙夜痛悼而寒心者也噫天實為之謂之何哉擬取出處去就大概賦詩百二十韻目之曰建炎行覽者庶有感云

金人初犯闕太歲在丙午殊恩擢樞廷愧乏涓埃補兩
河未奠枕杖鉞出宣撫乞身緣謗讒竄謫旅湘溆明年
丁未夏被命尹天府頗聞環京畿四面盡豺虎金湯雖
可恃憂在人不可禦見危思致命入援襄義旅旌麾亘江
湄畏景觸隆暑忽傳元帥檄果有城破語鑾輿幸沙漠
妃后辭禁籞皇孫與帝子取索及稚乳禮文包旂裳樂
器載筍簾金繒整公私技巧到機杼空餘宗廟存無復
薦簋簞淒涼蒼龍闕寂寞玉華廡疇能供銜粟誰與獻

肥瘠無從執羈勒安得生翅羽號慟絕復蘇灑淚作翻
雨繼聞宣赦書寶位居九五神明有依歸率土盡呼舞
皆言湯武姿勇智天所與向來使賊營英氣龍驕虜建
牙出危城帝命纘鴻緒不然艱難中何以脫契獮茲讎
不戴天兄弟及父母嘗膽思報吳枕戈懲在莒齊侯何
足稱句踐不須數周漢獲再興宣光定神武願言觀行
在玉色親黻黼丹誠遂披陳秘策得宣吐謀身雖拙計
許國心獨苦片言儻有合丐骨歸壠畝飛帆過金陵鼓

施適淮浦遙傳告大廷命相比申甫顧茲斗筭器何以
動堯禹深惟特達知感慨激肺腑如何日月光可以螢
燭助舍舟行汴堤驅車赴延佇傷心兵火餘民物亦凋
瘦中使乘駟來茶藥寵賜予拜恩丘山重坐使瘵癘愈
行行近南都戈甲震金鼓將佐迎路傍往往多舊部冠
蓋如雲屯賜燕金果園謝免徑造朝淚落濕殿礎初稱
宗社危天地同情怒次陳國多難實啓中興主末言樗
散材初不堪梁柱鼎顛將覆餗棟橈必傾宇況茲扶顛

危正賴肱與股大舜舉臯陶小白相仲父耕莘與釣渭
端不乏伊呂惟當博詢訪考慎作心膂封章屢懇辭帝
曰莫如女往作礪與舟不復容偃偻叩額宸扆前臣敢
論偽楚易姓建大號厥罪在砧斧柰何坐廟堂乃與臣
等伍更效老獵師十事聽裁處天子亮精誠一一皆可
許因陳禦戎策用此敢予侮河外須救援屏蔽資捍拒
問誰可驅策因薦亮與所京師當一到九廟陳鼎俎却
為巡幸計不可去中寓南陽光武興形勢亦險阻西通

關陝區東與江淮距三巴及嶺海寶貨可運取據要爭
權衡黠敵謀必沮募兵益貔貅買馬增牧圉號令新幟
旗仗械飭干櫓軍容久不振整頓就規矩潢池盜弄兵
羣惡相嘯聚偏師命剪除快若貓捕鼠餘寇悉款降分
隸歸籍簿蒐裒將帥材賞罰頗有序經營年歲間庶可
事大舉滅敵還兩宮雪恥示千古却隆太平基不愧宗
與祖豈知肘腋間乃有椒蘭妬含沙初射影聚毒陰中
蠱規模欲破碎謀議漸齟齬固知鼉峭姿自不敵媚嫵

恨無回天力，別此木中蠹。安能破銅山，但志燃郿塢。時
危敢尸祿，抗疏願引去。涕泗對冕旒，非不戀軒宇。君臣
以義合，無使赭春杵。帝度不可留，乃聽上印組。扁舟返
東吳，却理梁谿舫。多言更萋菲，貝錦成罪罟。尚荷皇天
慈，薄譴居鄂渚。我來雪霏霏，及此歲將暮。崎嶇山谷間，
避寇如避弩。行盡江南山，始踏湖北土。風煙愁浩蕩，鴻
鴈折儔侶。沉吟白雲飛，悵望黃鶴翥。晴川俯漢陽，葭菼
滿鸚鵡。家山渺安在，幽夢到別墅。三年再謫官，繚絡萬

里路浮遊幻境中塵跡歎仰俯翠華尚蒙塵吾敢念門
戶但嗟機會失事勢契先誤今年寇益橫春夏蹂京輔
萬騎畧秦關餘毒被陳汝五陵氣葱葱中原鬱膻膻棄
置不復論彌望皆莽鹵旌旃滿江淮寇鈔連齊魯六飛
竟何從秋晚尚江許何時包干戈禮瑞奠璜琥斯民安
田疇餘穀棲廩庾四方道路通舟車走商賈吁嗟乎蒼
天乃爾艱國步譬猶大厦傾著力事撐柱居然聽頽覆
此身何所措又如抱羸瘵邪氣久已痼不能親藥石乃

復甘粬救膏肓骨髓間性命若絲縷安得和緩徒舉手
為摩拊馴致海寓康蒼生有環堵

梁谿集卷十九

欽定四庫全書

梁谿集卷二十

宋 李綱 撰

詩十六

在湖外作
五十二首

中秋望月有感

張子公再得湖倅因書寄之

聞翁士特攜家居膠山

十六夜月二首

讀諸葛武侯傳

秋夜有懷二首

崇陽道中作四首

宿巖頭寺

寓崇陽西山定林院有感二首

巖桂二首

次韻鄭教授見寄

附鄭詩

灌溪三詠三首

題青龍興化禪院方丈

聞山東盜破黃州

得諸季書報薛克寅范茂載胡仲儼皆物故感

愴有作

山居四感四首

山居四景四首

山居四適四首

山居四卉四首

淵聖皇帝賜寶劍生鐵花感而賦詩

和淵明貧士詩七首 次韻淵明九日閑居

初寒

蜜蜂

病牛

中秋望月有感寄叔易李言并簡仲輔弟

前年河內中秋月玉帳初寒鐵衣滑羽書狎至不成眠
坐伴清光到明發是時季弟在幕中病隔紗窓共談說

出師未捷身已危
繼被宸章召還闕
去年中秋寓宋都
金針篆字看除書
夜同叔弟坐月下
仰望赤氣環斗樞
經營兩河初就緒
斥罷將帥良非圖
陵晨廷爭不可得
上還印綬歸東吳
今年謫官旅湖外
又值中秋有佳氣
纖雲四卷天無河
月色滿庭如潑水
緬懷諸季會合難
但與阿宗相勞慰
舉杯邀月應笑人
處處相逢萬餘里
我生端遇國步艱
出入將相三年間
功名富貴亦何有
慨念四海悲沈瀾
心馳沙漠關塞遠
身墮江湖風露寒

不須更問世間事但願對月身常開

張子公再得湖倅因書寄之

吳興別去久飄蓬清夢時遊茗雪中十里荷開生色畫
四圍波泛水晶宮喜君再擁朱轡貳顧我今成白髮翁
儻幸寬恩聽歸去定須相訪五湖東

膠山蘭若幽勝予寓梁谿久而未之到聞翁士特
攜家居其間賦詩見意

聞道膠山寺幽深過惠山僧房穿窈窕石溜落孱顏地

僻車馬絕山空松桂環鐘聲清靄外剝影白雲間旅泊
君得計飄流吾念還時危暫安適景勝且躋攀耿耿寸
心赤蕭蕭雙鬢斑搶攘憫甌越寂寞墮荆蠻風月三千
首軒裳五兩綸戎車傷浩蕩絳服羨編欄天地旌麾滿
江湖鷗鷺閑何時共樽酒世路正多艱

十六夜月二首

清光殊未減碧落絕纖塵絳闌飛金鏡銀潢渡玉輪
霏霏煙靄滅湛湛露華新倚幌人千里遙知翠黛顰

嫦娥長不老宮殿復新秋丹桂欲飄子素蟾相對愁林
寒枝繞鵲江迴水明樓逐客幾弦望又看成玉鉤

讀諸葛武侯傳

天下兵戈正雲沸伏龍鳳雛那可致掉頭自作梁甫吟
壠上躬耕方得意將軍漢喬真英雄惠然三顧草廬中
心期脗合論世故如魚得水雲從龍指麾顧眄定巴蜀
抗魏連吳分鼎足受遺乃在永安宮歎息君臣難繼躅
南征五月深渡瀘上疏北伐遵遺謨連年動衆擾關輔

數戰未必非良圖大星夜墜驚營壘壯志雄謀嗟已矣
至今魚腹淺沙中八陣依然照江水

秋夜有懷二首

草木又搖落關河方阻深龍庭空入夢鴈足不傳音黃
傘遊何處蒼生思至今娟娟江漢月空照逐臣心
坐失金湯險搖搖翠蓋飛空聞八駿御不見六龍歸天
地干戈滿滿湘鴻鴈稀漢宮秋夜月依舊照彤闈

崇陽道中作四首

我行江南春初見農事作及茲旅湖外秋稻半已穫
隔林聞晚春藁秸積籬落童稚亦熙熙田家有餘樂

溪清石齒齒山遠木蒼蒼落日煙景暮西風粳稻香
茂林歸鳥雀平隰下牛羊月露浩如洗淒然欲結霜

承平無事久萬里盡農桑誰使干戈起坐令民物瘡
關河成阻絕京洛亦淒涼尚喜江湖外斯民遊樂康

連年兵甲興猶幸東南稔食足無叛民間里得安枕
傳聞江淮間蝗旱今猶甚努力事變調未寒心已凜

宿巖頭寺

天氣沉陰迫季秋
通城早發宿巖頭
催寒小雨松桂濕
出岫孤雲嵌洞幽
緝錫真還行脚債
鉗鎚罕遇點眉儔
夜深雲散千峯月
注目寒空獨倚樓

寓崇陽西山定林院有感二首

踰年去天闕
長是寓僧廬
雲水志方適
軒裳情已疎
午風吹茗椀
夜月照牀書
忘我兼忘世
此生真有餘

清霜初入候
落葉半辭柯
歲晏遽如許
時艱將若何
關

山空歲月江漢自風波

闕

巖桂二首

汲水養巖桂最憐風露香黃花金瑣碎碧葉玉光銛却

憶七閩路有懷中隱堂相看久不厭氣味自難忘

閩中多此

木而余植於梁谿中隱堂凡數十本秋至開花香聞數里

遠地見佳木依然如故人難當禪客意為折數枝新自耐風霜早不慙蘭蕙春慙慙置瓶水寂寞伴閑身

教授鄭昌齡詩

雅望三朝第一流
端如砥柱屹清秋
愛君炯炯無他志
許國堂堂不自謀
夢繞蒼龍新闕角
涼生黃鶴舊樓頭
中興真主須真相
未雪雙鑾恥未休

次韻鄭教授見寄

泛梗飄萍逐水流
故人書到正霜秋
扶顛拯溺多迂論
問舍求田更拙謀
輦道淒涼沙磧外
鉤陳寂寞楚江頭

灌溪三詠

智閑禪
師道場

灌溪

道人卓錫使泉飛一派清甘滿石陂誰識灌溪真境界
也知只見溫麻池

妙峯菴

結菴雄踞妙高峯孤秀巉然萬境通不見德雲空住處
却須相遇別峯中

清涼境界

松蘿蔭翳色蒼蒼盛夏南風草木香普願衆生無熱惱

不應身獨占清涼

題青龍興化禪院方丈

廓然大室湛虛明
地僻山空萬象清
滴翠老杉清淨色
鏘金流水妙圓聲
慙慙禪客邀迎厚
寂寞宰官身世輕
野鶴孤雲無不可
會須還作二龍行

院在青龍山去黃龍不遠餘皆未到

云故

聞山東盜所謂丁一箭者擁數萬衆臨江破黃州
官吏皆保武昌江湖間騷然未知備禦之策感

而賦詩

時危貴權謀盜賊本王臣招徠駕馭之自足張吾軍蠡
蠆固有毒犀象亦可馴恩威儻得所摩拊還其淳光武
制銅馬曹公用黃巾資其戰大敵且以蘇良民去年議
招撫乃以此義陳置司未閱月來者如屯雲奈何力沮
罷坐使復紛紛傳聞中原寇鐵馬動成羣虎兕出於柙
玉石同其焚京輔困抄掠遂及江湖濱東南久平定郡
縣無城閭天塹非不險誰與守要津古來重鎮地控扼

非其人小敵已震懼大者當何云人謀自回通天意詎
不仁安得迴陽輝一令四海春

得諸李書報薛克寅范茂載胡仲儼皆物故感愴

有作

新故繼凋喪初非因荷戈波驚川閼水霜早葉辭柯世
上故人少錄中新鬼多浮生端若此傷感意如何

山居四感

關雉

翩翻噪繞高簷粒食枝棲安用貪怒關不知緣底事
敗毛輕毳落毳毳

戰蟻

欲雨山雲四面垂空庭蟻戰久相持只應薄伐檀羅國
正是槐安獻捷時

噪蟬

修竹茂林山寺幽蟬聲如沸滿清秋吸風飲露無求世
嘒嘒何為噪不休

吟蛩

月露淒清濕草根
寒蛩偏向夜深聞
隨時感氣成悲怨
不是來銷逐客魂

山居四景

松風

歲晚蒼官鬢髮青
回風披拂自悲鳴
不容逐客多歸夢
故作江湖波浪聲

竹露

森然繞檻翠琅玕，瘦節疎枝特地寒。
底事葉飛渾不舞，金風零露夜溥溥。

嶺雲

玉潔煙輕一片深，飄然出岫本無心。
孤飛遠映碧天去，也解重來為作霖。

牕月

月出松林已半廊，故開牕牖納清光。
嫦娥應訝年來瘦，十首新詩書滿牀。

山居四適

酌酒

山禽喚覺不成眠興若長鯨吸百川滿酌甕甌當金盞
陶然便作酒中仙

烹茶

安眠飽食更何求只欠雲腴茗一甌龍鳳不須誇北苑
槍旗且與試中州

讀書

平生長作蠹書蟬老去猶資慰我心每到古人名節處
慨然掩卷一沉吟

焚香

假榻禪房夜寂然瓦爐石餅藝龍涎
霏微縹緲根塵際
吸引方知鼻觀圓

山居四弄

拒霜

道人多種木芙蓉曉着清霜分外紅
萬葉千花本何有

因空成色色成空

雞冠

昂然璀璨繞堦除
端似羣雄領衆雛
只有一冠無別德
誰云魯國固多儒

菊

重陽旋覓菊花栽
青蘂蕭疎殊未開
我似陶潛正無酒
休將冷豔笑空罍

槿

步屨秋風見薜華疏籬灼灼繞田家朝開暮落君休笑
縱使多時終委沙

淵聖皇帝賜寶劔生鐵花感而賦詩

靖康寇騎窺帝閨中原慘澹生煙塵帝謂細柳真將軍
總兵欲使揮浮雲解賜寶劔御府珍魚腸盤屈松檜紋
縷金錯翠舟瑤琨刺截犀象如羔豚驅逐狂寇出邊垠
妖腰亂領徒紛紛龍吟蛟吼清夜聞乃知物能通神
邇來杜門空念思舊事誰復可共論今晨開匣觀龍文

鐵花繡澁蒼蘚痕東南卑濕相蒸熏坐使三尺光銕昏
安得礪砥來峨岷淬鋒斂錐硎發新霜寒冰滑無皴皴
指麾尚可清妖氛願提此劍平戎獠犬羊雖衆氣可吞
手斬可汗羈可敦天旋日轉還兩君書銘却勒燕然勲
攄憤刷恥志乃伸壯懷聊可垂乾坤緹繡什襲傳仍昆
衛綰之賜何足云

讀東坡和淵明貧士詩寄諸子姪云重九俯邇樽
俎蕭然今余亦有此歎因次其韻將錄寄梁谿

諸弟以發數千里一笑

迂疎得遠謫漂泊將何依區區一寸心未報三春暉歲
月不我與急景驚翻飛方看社鷺來又見霜鴻歸寬恩
尚廩祿未迫寒與饑荒山俯佳節九月誠可悲

淒涼寓僧舍寂寞坐松軒雖辭萬鍾祿尚未自灌園仲
尼猶在陳我厨晨有煙藜羹得一飽滴露味自研寒窓
寫周易更詠五千言儒生真可笑餓隱稱其賢

何以寫我意寄之朱絲琴鍾期久已死千古無知音棄

置不復彈調家難繹尋東籬採青蘂濁酒聊孤斟千馬
所不顧一斗誠可飲陶然又復醉誰識淵明心

骯髒老張鎬寂寞窮黔婁古人日已遠此意誰復酬墨
翟突不黔仲尼轍環周豈為一身計實懷四海憂沮溺
但躬耕吾豈斯人儔有酒且徑歸無酒不必求

佳晨迫九日旅食寓江干頗同謫僊人漂泊來銅官樽
俎可蕭條菊蘂漸可餐回風吹青松慘慘歲將寒但有
杯中物不愧簞瓢顏一觴復一詠明月窺禪關

自我去廊廟遠舉如飛蓬徇道敢懷祿謀身殊未工空
餘耿耿心不慚楚兩龔幸然諸季賢意氣與我同何當
恩聽歸兵息道路通却尋惠山路杖策得相從

我家梁谿上夢墮江湖州塊處無與語誰復為朋儔遠
懷作重陽置酒臨清流插花獨我少感物增離憂我亦
事杯杓阿宗相獻酬欲寄一枝菊川途方阻脩

次韻淵明九日閑居

天地一逆旅於焉寓此生羣陰慘將暮共愛九日名氣

清霜露肅天朗山川明月戶藹夜色風林颯秋聲東籬
菊有華可以延我齡采采金瑣碎泛此玉觴傾一醉遺
萬物況復軒裳榮淵明骨已朽千載同茲情時危丹砂
遠歲晏將何成

初寒


霜早風高寒氣萌可堪獨傍楚江行貂裘已敝蘇季子
葛屨更穿東郭生卯酒暈紅朝玉頰夜爐燃鼎沸松聲
妻孥千里應思我悵望牛衣此日情

蜜蜂

秋風淅淅桂花香
花底山蜂採掇忙
但得蜜成功用足
不辭辛苦與君嘗

病牛

耕犁千畝實千箱
力盡筋疲誰復傷
但願衆生皆得飽
不辭羸病卧殘陽



梁谿集卷二十